



Centar za zastupanje  
gradanskih interesa

Saopštenje za medije

### **Studenti žrtve neodgovornosti Uprave Studentskog centra**

*- Povećanjem troškova zaposlenih ozbiljno narušeno poslovanje SC – 1,3 miliona KM u periodu 2007 – 2012 utrošeno na “doradu učinka” – U istom periodu isplaćeno 165.000 KM članovima Nadzornog odbora -*

(SARAJEVO, 03.04.2012) - Nedavno isključenje plina studentskim domovima na Bjelavama i u Nedžarićima, zbog neizmirenog duga od 300.000 KM, tek je vrh ledenog brijega katastrofalnih uslova života studenata u navedenim domovima. Lošim upravljačkim potezima, prije svega povećanjem broja zaposlenih sa 165 u 2006. na 257 u 2011.godini, ozbiljno je narušeno poslovanje i finansijska stabilnost Studentskog centra. Od 92 dodatno zaposlena radnika, njih 32 su zaposleni u kuhinjama, dok je ostalih 60 radnika nepotrebno zaposleno u djelatnostima i objektima koje nemaju nikakve veze sa osnovnom funkcijom studentskog centra i koje u većini slučajeva stvaraju značajan gubitak. Prema konzervativnim procjenama, gubici nanesen ovakvim poslovanjem su samo u 2010.godini iznosili više od 600,000 KM!

Nesavjesnim vođenjem, Uprava Studentskog centra je, prije svega oštetila studente za koje se navodno zalaže, ali i budžet Kantona Sarajevo, kao svog osnivača. Naime, Odlukom o finansiranju bruto troškova zaposlenih u JU SC, Kanton Sarajevo, tj građani Kantona, pokrivaju 43,6% bruto troškova zaposlenih u ovoj ustanovi.

Zapošljavanjem 92 nova radnika, povećana su izdvajanja za njihove plate i naknade, pa su tako troškovi zaposlenih Studentskog centra porasli za više od – 1.800.000 KM u 2010. u odnosu na 2006.godinu.

Odsustvo elementarne brige za uslove pod kojima studenti u ovim domovima žive, pokazalo se kroz neopravdano i neracionalno trošenje sredstava Studentskog centra kao što su npr. pokloni za vjenčanje, darivanja za štampanje knjige i sl.koji su samo u 2010. godini iznosili 280.000KM. Osim toga, u periodu 2007. – 2010. godine za naknade i druge troškovi članovima nadzornih odbora isplaćeno je 165.000 KM.

Također, smatramo da je Uprava Studentskog centra dužna informisati javnost na šta se konkretno odnose ogromni troškovi usluga studentskog servisa na „doradi učinka“, i to u iznosu od cca 1,3 miliona KM u periodu 2007-2010. Imajući u vidu da je na primjer u 2010. SC centar ažurno obračunavao troškove zaposlenih (4 miliona KM), amortizaciju (150,000 KM) i održavanje stalnih sredstava (300,000 KM), nije jasno na šta se odnosi skoro 400,000 KM troškova usluga studentskog servisa na „doradi učinka“ u u 2010., tj. 1 milion i 300 hiljada KM ulaganja od 2007-2010.


U cilju zaštite studenata kao najvažnije populacije, s obzirom da je njihovo obrazovanje i kasniji profesionalni angažman od strateške važnosti za naše društvo u cjelini, predlažemo da se sredstva uštedjena racionalizacijom i smanjenjem troškova zaposlenih za 25%, prije svega u sektoru Ugostiteljstvo i turizam, ali u administraciji SC, koja bi iznosila oko 1 milion KM godišnje, reinvestiraju u poboljšanje uslova življenja, prioritarno kroz obnovu Studentskog doma Bjelave, a zatim kroz održavanje doma Nedžarići.





Centar za zastupanje  
građanskih interesa

Također, smanjenjem neracionalne potrošnje omogućit će se i dodatne investicije u poboljšanje studentskog standarda, prije svega kroz izmirenje dugovanja zbog kojih su studentima trenutno onemogućeni osnovni uslovi života.



Za dodatne informacije molimo kontaktirajte saradnicu Zlatu Hadžimuratović, mob br 061 107 656, ili na email: [zlata@сpi.ba](mailto:zлата@сpi.ba).

CPI je nevladina, neprofitna organizacija koja prikupljanjem, analizom i objavljivanjem podataka od interesa za građane, te njihovom promocijom, aktivno podržava izgradnju civilnog društva. Fondacija CPI nastoji omogućiti da javni i verificirani podaci važni za građane BiH budu lako dostupni u kontekstu i na način kojeg može razumjeti građanin koji se profesionalno ne bavi javnom administracijom i javnim finansijama.

